

Indikator peraturan perniagaan merosot perlukan reformasi

BH- 25/11/2021 ml: 2

Pendekatan dasar digalakkan dalam usaha berada antara sembilan ekonomi terbaik dunia

Oleh Saiful Haizan Hasam
saiful.haizan@bh.com.my

Kuala Lumpur: Kemerosotan antara indikator berhubung peraturan perniagaan di negara ini menuntut satu reformasi segera dilaksanakan kerana ia salah satu petunjuk penting pencapaian kecekapan kerajaan, kata Datuk Seri Ismail Sabri Yaakob.

Perdana Menteri berkata, indikator peraturan perniagaan di Malaysia menunjukkan trend kemerosotan dalam tempoh 10 tahun lalu iaitu daripada kedudukan ke-19 pada 2010 kepada kedudukan ke-47 pada tahun ini.

Sehubungan itu, beliau menegaskan, satu pendekatan dasar dan peraturan berasaskan bukti (EBP) perlu digalakkan dalam usaha kerajaan mencapai sasaran berada antara sembilan ekonomi terbaik dunia untuk subindeks Kecekapan Kerajaan.

"Ini gesaan yang kuat untuk pembaharuan pengawalseliaan. Kita mesti lakukan sesuatu.

"Dalam mencapai sasaran ini, pendekatan EBP perlu digalak-

kan. EBP akan diterapkan dalam mekanisme perancangan, penilaian dan pemantauan supaya dapat menjamin pembaharuan struktural yang menyeluruh bagi kelestarian pertumbuhan produktiviti dan ekonomi," katanya dalam ucapan perasmian Persidangan Kebangsaan Amalan Baik Peraturan (GRP) bertema 'Lonjakan Produktiviti Melalui Peraturan Berkualiti secara maya, semalam.

Turut menyertai persidangan anjuran Perbadanan Produktiviti Malaysia (MPC) ini ialah Menteri Kanan Perdagangan Antarabangsa dan Industri, Datuk Seri Mohamed Azmin Ali; Ketua Setiausaha Kementerian Perdagangan Antarabangsa dan Industri (MITI), Datuk Lokman Hakim Ali; Pengerusi MPC, Ram Ganesan Karthigasu dan Ketua Pengarah MPC, Datuk Abdul Latif Abu Seman.

Perdana Menteri berkata, dasar dan peraturan yang berkualiti melalui GRP bakal memudahcara operasi perniagaan, meningkatkan ketelusan dan meminimumkan bebanan kos serta sumber, sekali gus membolehkan industri berkembang dengan lebih dinamik dan anjal untuk kekal berdaya saing.

Beliau menjelaskan, asas kepada pelaksanaan GRP ialah pendekatan 'keseluruhan kerajaan' yang menitikberatkan kerjasama rapat dan bersepadu semua kementerian, agensi dan jabatan.

Katanya, untuk memperoleh impak menyeluruh, pembabitkan swasta, industri dan komu-

niti perniagaan dalam GRP juga akan dipertingkatkan.

Beliau turut menekankan bahawa prinsip, elemen dan proses dalam kaedah GRP mesti diterima pakai oleh semua kementerian dan agensi pengawal selia dalam penggabalan dan semakan dasar serta peraturan.

"Elemen-elemen GRP antaranya Analisis Impak Peraturan, Analisis Kos Faedah dan Penilaian Notifikasi Peraturan mesti dilaksanakan dengan teliti.

"Data dan maklumat yang terangkum harus membuktikan bahawa tindakan peraturan benar-benar membawa kepada kesejahteraan rakyat.

"Dengan penguatkuasaan Dasar Negara bagi Amalan Baik Peraturan (NPGRP) bermula 22 Jun 2021, Ketua Setiausaha Negara akan bekerjasama dengan semua Ketua Setiausaha kementerian dan Ketua Pengarah agensi dan jabatan kerajaan dalam memastikan pelaksanaan NPGRP yang menyeluruh," katanya.

Ismail Sabri, berkata GRP juga dapat menjamin kualiti dasar dan peraturan yang bakal menjadi pemacu kemakmuran negara dan kesejahteraan rakyat.

Beliau, berkata kemakmuran negara terutama dalam era memerangi pandemik telah dicerminkan melalui tema dua dokumen ekonomi utama mutakhir ini iaitu 'Malaysia Makmur, Inklusif, Mampan' dalam Rancangan Malaysia Ke-12 (RMK-12) dan 'Keluarga Malaysia, Makmur Sejahtera' dalam Bajet 2022.